

# Poesie dialettali

**E' tradiment  
di Massimo Giorgi  
Mondaino**

Lia l'è da mo cl'al saviva  
E tel let sa lò ancora la dormiva  
L'ai laveva li mudand  
E la badeva i fiol per dvintè grand.  
Tot i dè l'ai cusciva da magnè  
E li bestie la aviva da gvirnè.

Mo quand e sol è cascheva sota li muntagn  
E marid è partiva a ciachè tot è guadagn  
L'acindiva la su muturetta  
E via piò svelto d'una saetta.

El giva: "A vag ma l'osteria"  
Mo lò el chiapeva unenta via.  
L'andeva sempre te casein  
E dl'amor e feva e pein.

I giva che ormai l'iva l'ament fèssa  
Mo i giva incà che n'andas mai da la stessa.

L'arturneva ma chesa sempre pas mezanot  
Sla moi tel let cla pareva un cocc rot  
La aviva pient fin poc prima  
E dli volt fin a la matina  
Quand la sentiva anflè la chiev tla porta  
Dli volt la prifiriva esa morta  
La feva finta cl'era un pez cla dormiva  
E l'an se mai mosa gnenca sla piagniva.

Tla su ment  
l'ai mandeva qualch acident  
Mo tel su cor

iu sbarlucèva un po' d'amor  
e una nota quand è marid l'è artorne a chesa  
l'ha vest tla cambra la luc acesa  
l'ha trov la moi stesa dnenz me let  
sna cultela anflèda te pet.

La s'è mazedada perchè me marid ancora l'ai vleva bèn  
La s'è mazedada perchè u la trateva peg d'un chèn.

**E birichin**  
**di Giuseppe Lo Magro**  
**Riccione**

Og da e mèr e tira un gran vènt.  
Sòbte us mèt a spitnè la sabia  
u la prèlla com un sarpènt  
vrucìd m'un sòrs pin ad rabia.

Ma uj pis da dè dan d'impartòt  
mal robe, mal persoune, mi animèl.  
Du cl'ariva l'è un gran casot  
un si pò stè tranquèl invèl.

In èlt e s-cènta un'antena  
pò e cala svelt sora una bughida  
e pèr che te prim us la nèna;  
saltrèin u la lasa tòta struflida.

E ciapa una bocia, u la rugla  
e tra i sas u la fa a tridèl.  
T'un znoc us fa una brugla  
sguilènd ad cursa che burdèl.

Un s'arposa e un si dà pèsa,  
e cmènza a balè s'una sutèna  
d'una dona scapèda da la spesa  
"Lasme stè, fiul d'una putèna"

la urla la purèta spaventèda

un pì sora la bici e cl'elt te fos.  
Lò e fa una risèda sgangarèda  
e u la lasa s'un strèmle mados.

E un sparagna gnènca un vicèt  
che a fadiga e traversa la strèda.  
E brèt ul fa vulè ilà sò, ti tèt,  
pò uj carèza, birichin, la testa plèda.

Quand da scarzè us'è bèla stòf  
e pèzga agl'urece strache m'un chèn  
e me mèr l'artorna isè d'arbòf.  
Scrichènd l'oc e dis: "As vidèm admèn".